

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- उपराज्यपाल मनोज सिन्हा होरें राजौरी दा दौरा कीता, पाकिस्तानी गोलाबारी करी प्रभावित परौआरें कन्नै मिले ते राहत ते पुनर्वास दे कम्में दा जायजा लैता।
- एल.जी होर नौशहरा च तैनात सैनिकें कन्नै मिले ते आप्रेशन सिंदूर दी कामयाबी च उंदी भूमिका दी सराहना कीती।
- मंत्री सतीश शर्मा होरें आखेआ ऐ जे सरकार लोकें दिएं दिक्कतें-परेशानिएं दा तौले ते पारदर्शी ढंग्गै नै नबेड़ा करने लेई बचनबद्ध ऐ।
- जम्मू-कश्मीर स्कूली शिक्षा बोर्ड नै जम्मू-कश्मीर ते लद्दाख केंद्र शासित प्रदेशें च स्याले ते सोए आहले जोनें लेई पैहले आंगर बक्खरा शैक्षणिक कलेंडर जारी कीता ऐ।
- IPL च मुम्बई इंडियन्स नै दिल्ली कैपिटल्स गी रहाइयै प्लेऑफ मुकाबले च अपनी थाहर पक्की करी लैती ऐ।

<><><><><><>

LG-Rajouri

उपराज्यपाल मनोज सिन्हा होरें कल राजौरी दा दौरा लाया ते पाकिस्तान आसेआ विजन उक्सावे दे कीती गेदी भारी गोलाबारी शा प्रभावित परौआर आहले कन्नै मलाटी कीती।

उपराज्यपाल होरें राजौरी दे गौरमेंट मेडिकल कॉलेज दा बी दौरा लाया ते पाकिस्तान दी गोलाबारी च घायल लोकें दी डोल पुच्छी। एल.जी होरें राहत ते पुनर्वास उपाएं ते जरूरी चीजें बस्तें दी उपलब्धता सेहत ते आपातकालीन सेवा, संपत्ति ते माल-बच्चे गी होए दे नुकसान ते जिले च नमें बंकरे दी जरूरत सरबंध्यत होर दुए मामले दी बी समीक्षा कीती। मीडिया कन्नै गल्ल करदे होई एल.जी होरें आखेआ।

एहदे मगरा उपराज्यपाल होरें नौशहरा दा दौरा लाइयें पाकिस्तानी गोलाबारी करी तबाह होए दे घरें-मकानें दी मौजूदा स्थिति दा जायजा लैता। उनें मकामी लोकें कन्नै गल्लबात कीती ते उंदी समस्याएं बारें बी जानकारी हासल कीती।

<><><><><><>

LG-Troops

उपराज्यपाल मनोज सिन्हा होरें कल बन्ने उप्पर सुरक्षा स्थिति दा जायजा लैता ते नौशहरा सेक्टर च तैनात बहादुर जवानें कन्नै मलाटी बी कीती। एल.जी होरें इस दौरान ऑपरेशन सिंदूर च सेना दे जवानें दी बेमिसाल बहादुरी गी सलाम कीता। उनें गलाया जे स्हाड़े बहादुर सैनिकें दी दलेरी करी भारत नै एह निर्णायक जित हासल कीती ऐ। उनें आखेआ जे आतंकवाद गी बनकदा परता देने ते पाकिस्तान च आतंकी ठिकानें गी तबाह करने लेई अज्ज पूरा देश सशस्त्र बलें दी वीरता उप्पर फख्र मसूस करा'रदा ऐ। एल.जी होरें आखेआ जे ऑपरेशन सिंदूर भारत दी सैन्य ते सामरिक शक्ति दी जींदी जागदी मसाल ऐ। एल.जी होरें आखेआ।

<><><><><><>

Satish

ट्रांसपोर्ट मंत्री सतीश शर्मा होरें आखेआ जे सरकार पारदर्शिता, जवाबदेही ते समें उप्पर लोकें दियें समस्याएं दा हल करने लेई प्रतिबद्ध ऐ। मंत्री होरें कल श्रीनगर च बक्ख-बक्ख प्रतिनिधिमंडलें कन्नै मलाटी कीती। इंदे च जम्मू-कश्मीर रियासती शिड़क यातायात निगम-एस.आर.टी.सी. दे साबका मलाजम, खाद्य नागरिक आपूर्ति ते उपभोक्ता मामले कन्नै सरबंधत विभाग दे प्रतिनिधियें सने गांदरबल जिले दे प्रतिनिधि बी शामिल हे। इस मौके उप्पर प्रतिनिधिमंडल दे सदस्यें कर्मचारियें दे कल्याण जन सेवा वितरण ते प्रशासनिक सहयोग सरबंधी बक्ख-बक्ख मंगां बी रक्खियां।

<><><><><><>

Pak-Official

भारत नै नमी दिल्ली स्थित पाकिस्तान उच्चायोग च कम्म करा'रदे इक पाकिस्तानी अधिकारी गी आधिकारिक स्थिति मूजब नेई होने आहली गतिविधिएं च शामिल होने करी अवांछित घोषित करी दिता ऐ। अधिकारी गी 24 घंटे दे अंदर-अंदर भारत छोड़ने लेई आखेआ गेआ ऐ। विदेश मंत्रालय नै आखेआ ऐ जे पाकिस्तान उच्चायोग दे प्रभारी गी इस सरबंधी च इक आपत्ति पत्र जारी कीता गेआ ऐ। औदे च एह यकीनी करने आस्तै आखेआ गेआ ऐ जे भारत च कोई बी पाकिस्तानी राजनयिक या अधिकारी कुसै बी चाल्ली कन्नै अपने विशेषाधिकारें दा गलत इस्तेमाल नेई करै।

<><><><><><>

JK-Bose

जम्मू-कश्मीर स्कूली शिक्षा बोर्ड नै कल पूरे जम्मू-कश्मीर ते लद्दाख केंद्र शासित प्रदेशें च पैहले आंगर मार्च नवंबर शैक्षणिक सत्र बहाल करदे होई नमें सिरेआ शडयूल जारी करी दिता ऐ। आकाशवाणी दे जम्मू संवाददाता नै जानकारी दिती ऐ जे जारी इक आधिकारिक अधिसूचना च बोर्ड नै साफ करी दिता ऐ जे इस फैसले कन्नै जम्मू-कश्मीर ते लद्दाख च पैहले आंगर सयाले ते सोए आहले जोनें च बक्खरा-बक्खरा शैक्षणिक कार्यक्रम, कलंडर मूजब लागू होग। कश्मीर डिविजन, जम्मू डिविजन दे सयाले आहले जोन ते लद्दाख च शैक्षणिक सत्र हून परतियै मार्च कोला नवंबर तगर होग जेदे नतीजें च उत्थे 9मीं, 10मीं, 11मीं ते 12मीं दे मतेयान अक्टूबर-नवंबर 2025 च होंगन। जिसले जे जम्मू प्रांतै दे सोए आहले जोनें च 2025-26 आहले शैक्षणिक सत्र दे सलाना मतेयान फरवरी-मार्च 2026 च होंगन।

<><><><><><>

DC-Kishtwar

किश्तवाड़ दे डिप्टी कमिशनर राजेश कुमार शव होरें औंदी श्री मचेल माता जी दी यात्रा 2025 लेई कीती जा रदियें तैयारियें दे चलदे किश्तवाड़ पाडर शिड़क उप्पर कीते जा रदे मरम्मत दे कम्में दा जायजा लैता।

मीटिंग दौरान डी.सी.होरे चनाह घाटी, बिजली परियोजनां लिमिटेड सी.वी.पी.पी.एल.गी निर्देश दिते जे तीर्थ यात्रुएं दी सुरक्षा ते बिजन कुसा रोक-टोक दे आओजाई यकीनी बनाने लेई सिनहद नाला जित्थे ल्हास-पस्सियां पौने दी शँका बनी दी रौहंदी ऐ, उत्थे फौरी तौरा पर मरम्मत दे कम्म गी तोड़ चाड़ेआ जा।

<><><><><><>

Lecture-Traffic

सरकारी डिग्री कॉलेज किशतवाड़ दी एन.सी.सी.युनिट आसेआ ट्रैफिक पुलस हाइवे रामबन दे सहयोग कन्नै ट्रैफिक नियमें ते सड़क सुरक्षा बारै इक लैक्चर दा सरिस्ता कीता गेआ जेदा मकसद विद्यार्थिं गी जागरूक करना हा। इस मौके पर एन.सी.सी.ट्रैफिक राजा आदिल हमीद मुख परौहने ते माहिर दे तौरा पर मजूद हे जिनें कालेज दे विद्यार्थिं गी संबोधित करदे होई सड़क पर गड़्डी चलांदे ट्रैफिक नियमें दी पालमा करने दे महत्व पर लो पाई। उनें नौजवाने गी आखेआ जे ओह होरने गी बी गड़्डी चलांदे सड़क सुरक्षा नियमें दी पालमा करने लेई प्रेरित करन जियां हेलमेट पाइए बाइक चलाना, सीट बेल्ट दा इस्तेमाल, तेज रफ्तार गड़्डी नेई चलाना, सड़क कंडे कुदरै बी गड़्डी नेई खडेरी देना वगैरा-वगैरा तां जे हादसे दी शँका गी घट्ट कीता जाई सकै।

<><><><><><>

IPL

ते हून आई.पी.एल क्रिकेट। आई.पी.एल टी-20 च मुम्बई इंडियन्स दी टीम प्लेऑफ मकाबले च पुज्जने आहली चौथी ते खीरी टीम बनी गई ऐ। कल मुम्बई दे वानखेड़े स्टेडियम च खेड़े गेदे इक मैच च उन्नै दिल्ली कैपिटल गी 59 रन्ज कन्नै रहाड़्यै प्लेऑफ मकाबले लेई अपनी थाहर पक्की करी लैती। जिस्सलै जे दिल्ली कैपिटल्स दा आई.पी.एल 2025 दा सफर उत्थै गै खत्म होई गेआ। मेजबान मुम्बई नै टॉस हारेआ ते उसी पैहले बल्लेबाजी करने लेई आखेआ। जिन्नै 20एं ओवरें च 5 विकेटां मोहाड़्यै 180 रन्ज बनाए। जित लेई लोड़चे 181 रन्ज दे लक्ष्य दा पिच्छा करदे होई दिल्ली दी टीम 18 ओवर ते 2 गेंदें पर गै आलआउट होई गई ते छड़े 121 रन्ज गै बनाई सकी।

<><><><><><>